

Oferta pa gobernador firma pa bono tabata riba mesa basta dia caba

ORANJESTAD —A pesar cu antayera un carta a sali pa gobierno indicando esaki, ya caba prome cu minister di Financia Juan David Yrausquin a entrega su retiro, gobierno di Aruba tabata na altura cu gobernador tabata dispuesto pa firma un ley pa emiti bononan, pa asina por drecha likides di gobierno.

For di fuentenan fidedigno, Bon Dia Aruba a haya di compronde cu gobierno diferente biaha a haya di compronde cu - pesar cu presupuesto 2014 no tabata ley ainda - gobernador Fredis Refunjol lo tabata dispuesto pa firma un ley den cual gobierno ta emiti bononan. Esaki lo ta segun articulo 2 di e propio presupuesto den cual ta duna minister di financia autorizacion pa fia un maximo di alrededor di 218 milyon florin, entre otro via bononan (staatsobligaties). Te hasta a laga sa cu instancianan consultativo Raad van Advies y Algemene Rekenkamer lo no obstaculisa proceso aki, basta gobierno tuma su pasonan y percura cu su likides keda na ordo. Hopi tabata pues e preguntanan cu a surgi una bes cu a sali na cla cu lo no traha un ley pa emiti bononan. A puntra minister di financia saliente Juan David Yrausquin y e ta mantene na Bon Dia Aruba cu sin un presupuesto aproba no por emiti bononan. A puntra e mandatario for ki tempo e tabata na altura di e posibilidad cu aparentemente a wordo duna diferente biaha pa emiti bononan, pero no por a haya un respuesta prome cu ceremonial di edicion di awe. Mientras tanto medionan local a anuncia cu conseho di minister a aproba ley di emiti bono y a entrega esaki cerca



gabinete di gobernador.

Ta acepta retiro

Pa lora ta retiro di minister Yrausquin, gobernador Refunjol a ricibi su carta di retiro y a duna di conoce cu e lo bay di acuerdo cu e pedido pa acepta entrega di cartera di e politico. Gobernador a pidi parlamento pa nan opinion. Presidente di parlamento di su banda a pidi prome minister Mike Eman pa tur carta y documento pa asina haya un miho bista riba tur lora e transcuri na caminda pa retiro di minister Yrausquin. Mester bisa cu basta lihe fraccion di MEP a pidi - te hasta a manda un rappel - un reunion di urgencia pa debati no solamente retiro di minister Yrausquin, pero tambe e situacion constitucional actual y documentacion. Debate riba retiro di minister Yrausquin lo tuma luga cu un comision central na prome instante, cu lo wordo sigui despues pa un debate publico. No a pone fecha pa e debatenan aki ai-

nda. Tin reces oficialmente desde mañan, pero asunto aki ta urgente suficiente pa kibra reces y debati. Tur parlamentario ta haya tres minuut cada un pa duna nan opinion of sentimiento pa lora ta retiro di minister di financia. A invita Yrausquin pa ta presente na e debatenan aki.

Fraccionnan

Prome minister Mike Eman por lo tanto ta indica cu ainda ta papiando cu Yrausquin riba su futuro politico. Situacion den seno di AVP ta muestra un tiki mas calma despues di e noticia grandi. Rumor nan, entre otro cu Paul Croes tambe lo tabata considerando pone su puesto un banda a resulta di no ta berdad, of miho bisa e politiconan concierne a haya oportunidad pa bisa cu nan no ta berdad. Durante conferencia di prensa di fraccion di AVP, lider di fraccion Rene Herde a reitera cu su partido no ta atacando gobernador pero ta urgi si pa e pone su firma bou di e

presupuesto. Andin Bikker di PDR di su banda ta haya cu introduccion di un propio asina yama 'begrotingskamer' pa controla presupuesto lo



por ta un solucion pa cu e debacle aki na unda Bikker ta considera cu Aruba a perde su autonomia. 'Begrotingskamer' aki lo mester cay bou di Raad van Advies. Durante MEP su conferencia di prensa, parlamentario Glenbert Croes a comenta cu minister Yrausquin den su concepto a wordo sacrifica

'pa salba ego y reputacion di Mike Eman'. Segun Croes, prome minister no a exigi na prome minister Mark Rutte pa topa cu su minister di Financia cu tabata na Hulanda. E parlamentario ta haya cu henter gabinete Mike Eman II tambe mester a tuma su conclusion y entrega su retiro. Segun e den 28 aña di Aruba su Status Aparte 'nunca hamas nos fianza a wordo supervisa'.

Bermudez

Mientras tanto ainda ta wardando riba confirmacion oficial di un sucesor pa minister Yrausquin. Tin indicacion fuerte cu su consehero Angel Bermudez, cu tin su trayectoria pero den mesun rosea apenas a cuminsa traha na Cocolishi, lo wordo apunta pa fungi como vakminister. Tambe no tin niun claridad ainda riba ki dia team di College Financieel Toezicht (CFT) lo bin Aruba pa cum-

insa riba nan investigacion di presupuesto 2014. E idea ta pa un rapport preliminar yega cerca gobernador y gobierno Hulandes, pa gobernador porfin por firma e ley. Despues un rapport definitivo mester keda cla den dos luna, prome cu presupuesto 2015 su fecha di entrega na september. □